

REGULAMENTO MUNICIPAL DE PASE DE DETERMINADOS FUNCIONARIOS Á SEGUNDA ACTIVIDADE

De conformidade co Convenio asinado entre este Concello e os Sindicatos, aprobado polo Pleno en sesión de 19 de maio de 1995 e publicado no DOG do 10 de abril de 1996, nº 70, redáctase este Regulamento, para establecer as condicións nas que determinados funcionarios terán dereito a optar a postos vacantes da segunda actividade.

Artigo 1.-

Poderán solicitar postos da segunda actividade os funcionarios do Concello da Estrada pertencentes á Escala de Servicios Especiais, que ocupen postos de policía local ou persoal de oficios.

Artigo 2.-

Serán destinados á segunda actividade os postos de Conserxe dos Colexios Públicos reservados a funcionarios no cadro de persoal do Concello, ou outros de Conserxe noutras dependencias, excepto as de Conserxe do Concello e Notificador.

Artigo 3. -

Para poder optar a estes postos requírese cumprir os seguintes requisitos:

a.- Ter cumprida a idade de 55 anos.

b.- Sen ter cumprida a idade indicada, os que xustifiquen a insuficiencia de aptitudes psicofísicas que o imposibiliten para o exercicio das tarefas propias do seu posto de traballo. Neste caso terán que xustificar igualmente, mediante certificado médico, que non están incapacitados para prestar os servicios propios do posto ó que opten. O Concello poderá, se o considera oportuno, pedir ó solicitante que se someta ós recoñecementos médicos que estime pertinente.

Artigo 4.-

A preferencia na adxudicación concederase:

a.- En primeiro lugar os maiores de 55 anos con insuficiencias psicofísicas.

b.- En segundo lugar os que xustifiquen o padecemento destas insuficiencias, anque non alcancen a idade de 55 anos.

c.- En terceiro lugar os que teñan cumpridos os 55 anos. En todo caso e dentro de cada grupo, terán preferencia os de maior idade.

Artigo 5.-

Os que soliciten un posto de conserxe dun Colexio Público presentarán un certificado médico no que se faga constar que non padecen enfermidade infecto-contaxiosa ningunha.

Artigo 6.-

Para poder solicitar un posto da segunda actividade será requisito indispensable estar na situación de servizo activo durante os últimos tres anos.

Artigo 7.-

O funcionario que pase a segunda actividade conservará as retribucións básicas correspondentes ó seu posto de orixe, e o Complemento de Destino. O Complemento Específico manterán ó do seu posto de orixe, se ben quedará conxelado ata que se iguale co novo destino.

Artigo 8.-

O pase a segunda actividade non modificará a idade establecida para a xubilación forzosa, que seguirá sendo a do posto de orixe.

Artigo 9.-

Cando quede vacante unha praza das asignadas a segunda actividade o Concello a sacará a concurso, primeiro entre os funcionarios da mesma categoría e despois entre os que reúnan os requisitos para optar a segunda actividade. De non cubrirse o Concello incluíraa na oferta de emprego e sacaráa a oposición libre.

Artigo 10.-

Cando non exista vacante nas prazas que poden cubrirse mediante a segunda actividade e se produza o caso dun funcionario da policía local ou operario que teña diminuída a súa capacidade física para realizar as funcións propias do seu cargo, pero conserven as requiridas para outras funcións, a Alcaldía poderá, mediante a correspondente resolución, adscribilo a outras funcións ou a postos de traballo máis axeitados a ser posible dentro do Corpo e sen alteración do seu réxime retributivo.

Artigo 11.-

As baixas que se produzan no corpo, como consecuencia do pase dun funcionario a segunda actividade, consideraranse como prazas vacantes e proveranse na forma legalmente establecida.

	Acordo	Publicacion
Aprobación inicial	Pleno	BOP 02.08.2002
Aprobación definitiva		BOP 17.10.2002